

TUSI TAIALA

MO LE PULEA MA LE VA'AIA LELEI O I'A MA FIGOTA

O LE AFIOAGA O

APOLIMA UTA

ASO 28 Novema 2003

SAUNIA:

Pule mamalu a Alii ma Faipule ma Tagatanuu o le Afioga o Apolima Uta ma le Lagolagosua a le Ofisa o Faigafaiva a le Matagaluega o Faatoaga ma Faigafaiva.

Faalupeaga o le Afioaga :

Apolima-uta :

Susū le Aiga Sa Sa'ū ma le Alii matua

Susū Usoalii ma Lilo

Alalata'i lau fetalaiga i le Tu'ua Leva'a ma Sa'umā

FAASOLOGA

1	Upu Tomua	4
2	Autu	5
3	Faamatalaga e Uiga i le Afioga	5
4	Ituaiga Faigafaiva Taatele	5
5	Tulafono Faalenuu : Fesootai ma le Siosiomaga o le Gataifale o Apolima Uta	6
6	Tapenaga o Ienei Tusi Taiala	6
6.1	Feiloaiga muamua ma le Afioga	6
6.2	Faatalatalanoaga i Vaega e Tolu	6
6.3	Komiti Faufautua o le Faasao	6
6.4	Pasiaina o Ienei Tusi Taiala	7
6.5	Filifilia o le Komiti o le Faasao	7
7	Fuafuaga Faataatitia a le Afioga	7
7.1	Faamalosia Tulaafono Faalenuu : Faasaina Faigafaiva-le-Talafeagai	8
7.2	Ia Faasaina le toe lafoai o Lاپisi i le Sami ma le Matafaga	8
7.3	Ia Faasain Faigafaiva mai isi Afioga	9
7.4	Ia faasaina ona toe Fagotaina mai I'a ma Figota Laiti	9
7.5	Ia Aoina mai i Uta Alamea ma Faatamaia ai	10
7.6	Ia Faasaina Upega ma Tili Mata-ninii	11
7.7	Ogasami Faasaina	11
7.8	Tufaina atu ma le Faafaatoagaina o I'a ma Figota	12
7.9	Taofia le Taina i lalo o Laau i autafa o Nofoga Faataufusi	13
7.10	Mana o Talosaga	13
8	Talosaga a le Afioga	13
9	Toe Iloiloina o Ienei Fuafuaga Tatau	14
9.1	Otootoga	14
9.2	Fuafuaga Faataatitia a le Afioga ma le Ofisa o Faigafaiva	14
10	Komiti o le Faasao o le Gataifale	15
11	Vaaiga Matagofie i le Afioga	16

1. UDU TOMUA

O le faaitiitia o i'a ma figota i Samoa e afua mai i le anoanoai o mafuaaga eseese. O nisi o nei mafuaaga e aofia ai;

- le tanumia o vaega o le gataifale mo eleele-fou (fanua)
- le soona fagotaina faa-le-tatau o le gataifale e le aufaifaiva
- le faaaogaina o faigafaiva-le-talafeagai
- ma aafiaga mai i afa malolosi (Ofa 1990, Val 1991, Heta 2004) ua tuanai.

O nei faafitauli o loo tulai mai pea i gataifale o si o tatou atunuu ma o loo avea lea ma auala e faaitiitia ai i'a ma figota. O le faaitiitia o nei tamaoaiga o le sami e faaitiitia ai foi porotini maua (protein) mo le taumafa tatau (taumafa paleni) mo tagatanuu o Samoa. O se atugaluga tele lea i le Malo o Samoa na faapea ai ona faatino nisi o fuafuaga faataatitia e pei ona faailoaina atu i lalo.

O le tausaga e 1988 na pasiaina ai e le Kapeneta le **Tulafono Autu Tau Faigafaiva** e faamalositia ai le (i) laiseneina o vaa-fagota mo fagotaga, (ii) faasaina le faia o faigafaiva-le-talafeagai i ogasami o Samoa. Peitai ane o nei tulafono uma e lei silafia e le toatele o tagatanuu o Samoa i ia vaitaimi. O se tasi o mafuaaga ona o le toaitiiti ma le toagaogao o le aufaigaluga. Ae o seisi mafuaaga ua talitonu le taofi na faigata ona ausia ai lea tulaga ona e lei iai se polokalame i lea vaitaimi e pei o le Polokalame o le Faasao o le Gataifale mo Nuu ma Afioaga. O leni polokalame e pei ona faatinoaina nei, ua fesoasoani tele i le faa-malamalamaina mo le silisifia e le mamalu o le atunuu o ia tulaga.

I le tausaga 1995 na pasiaina ai e le Kapeneta le **Tulafono Faatonutonu e Faatapulaaina ai le Laiti o I'a ma Figota**. O leni tulafono na pasiaina ma le faamoemoe e tuu avanoa ma fesoasoani i le faasaina o i'a ma figota ua tauau ona mou atu. O le faatapulaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoaiga o le gataifale. O loo faapipiina atu i le pito i tua o le Tusi Taiala se Pepa o Faamatalaga (6) mo faamatalaga faaopopo o leni tulafono.

O **Tulafono Laiti** a nuu ma afioaga ua amanaiaina e le Faamasinoga. O se tasi lea o auala ua tuu sao ai e le Malo le malosi i nuu ma afioaga e mafai ai ona o latou molia i le tulafono soo se tagata e le usitaia tulafono ua aiaia i totonu o le Tusi Taiala a le afioaga o Apolima Uta. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaaia lelei o le gataifale i tulaga o ona tamaoaiga ma lona siosiomaga mo se lumanai manuia. O tulafono laiti e soalaupuleina ma autasi iai le Pule Mamalu a Alii ma Faipule o afioaga taitasi.

Polokalame o le Faasaina o le Gataifale i Nuu ma Afioaga

O le Polokalame o le Faasao na amataina e le Malo e taua mai lea i le auunaga a le Ofisa o Faigafaiva i le tausaga e 1995. I le amataga mai la o leni polokalame sa faapea ona lagolago malosi ai le Malo o Ausetalia e auala mai i lana AusAID i le faa-tupeina mo le 5 tausaga seia oo mai i le tausaga e 2000 ma faamuta ai loa lana fesoasoani. Peitai na e lei muta ai i lea tausaga ona sa tauaveina loa e le Malo o Samoa le faatupeina o leni polokalame taua. I le taimi nei, ua oo atu le aofaiga i le 85 nuu ma afioaga ua faatinoaina ai leni polokalame. Peitai, mai i le 85 lea, e na o le 52 nuu ma afioaga o loo tulai malosi ma faatauina pea leni polokalame. O le talitonuga ma le faamoemoe autu o le tele o nei afioaga o le silasila lea i le lumanai manuia mo tagata lautele o le afioaga aemaise ai o tupulaga lalovaoa.

O le polokalame o le Faasao e galulue soosoo-tauau iai le ofisa ma le afioaga i nisi o fuafuaga faataatitia aua se lumanai manuia aemaise o le toe faa-tamoaigaina o le gataifale. I le amataina o leni polokalame e faatinoaina ai ni faatalatalanoaga ma vaega eseese o le nuu e pei o le vasega o matai, tina ma taulelea. O nei feafaasoaiga e faailoa mai ai faafitauli o loo faafeagai ma le gataifale o le afioaga. E talanoaina foi aafiaga ma mafuaaga o nei faafitauli ma soalaupule ai ni fofu. Ma sa faapea loa ona soalaupule ai e Alii ma Faipule, tagatanuu o le afioaga ma le ofisa nisi o fuafuaga

faataatitia e foia ai nei faafitauli. O se faataitaiga o se fuafuaga faataatia a le afioaga i lenei polokalame o le faia lea o se ogasami faasao e faasa ona solia, kolosiina pe fagotaina foi.

O nisi o fuafuaga faataatitia e tele ona faaogaina e afioaga mo le pulea ma le vaaia lelei o tamaoaiga (i'a ma figota) o le gataifale e aofia ai le faasaina o;

- vailaau oona
- faanaia
- ava-niu-kini
- tuiga, faamoa, saeuga
- i'a ma figota laiti
- upega ma tili mataninii
- lama moli-uila i po

O nisi o fuafuaga o Tusi Taiala i le tele o afioaga mo le pulea tatau ma le vaaia lelei o le siosiomaga o le gataifale e aofia ai le;

- aoina o alamea (crown-of-thorn starfish)
- faasaina o le lauina o le oneone o matafaga
- lafoai o lapisi i le gataifale (matafaga)

O lenei polokalame e taua tele mo le lumanai manuia o Samoa ma ona tagatanuu. O le faaleleia o le siosiomaga ma le faatuputupulaia o le tamaoaiga o le gataifale o se faamoemoe e talitonu e mafai ona faatinoina i o tatou lava lima. E faa-tauaina tele le lagolagosua a le Pule ma le Faamalumaluga a Alii ma Faipule o afioaga i lenei polokalame.

2. AUTU

O le autu sa faatalatalanoaina ma malilie autasi ai i taimi o faatalatalanoaga i vaega taitasi o le afioaga o Apolima Uta.

Ina ia puipuia le siosiomaga o le gataifale ma Toe faatupulaia o i'a ma figota mo tupulaga o le lumanai

3. FAAMATALAGA E UIGA I LE AFIOAGA

O le afioaga o Apolima Uta e i le itu i matu i sisifo o le motu o Upolu. O lona faitauaofai e tusa ma le 500, e aofia ai matai, tina ma tamaitai, aumaga ma tamaiti. O lenei aofaiga e le o faitaulia ia i latou ua faimalaga atu i atunuu i fafo ma aumau ai i Niusila, Ausetalia, Amerika ma isi atunuu.

O Apolima Uta e i ai lona aau e mai lava i le itu i Sasae seia paia le itu i Sisifo. O lona mamao pea ma le 1/2 maila. O le umi o le aau pea ma le 500 mita mai le matafaga. O le vaega pito i loloto o le aloalo e tusa ma le 5 mita i taimi e sua ai le tai ae 1/2 mita nisi o vaega o le gataifale, a o nisi vaega e ali atoa le alititai pe a oo ina pe le tai.

O lenei afioaga e mamalu tele ona pulega aua e pulea lelei e Alii ma Faipule o le afioaga. O aumaga e lava saunia i taimi uma aua le tautuaina o matai, o tina latou te avatua fautuaga lelei mo ni mataupu tau lotoifale o le afioaga.

4. ITUAIGA FAIGAFAIVA TAATELE

E tele ituaiga faigafaiva e mafai ona faatinoina i le aloalo o le afioaga o Apolima Uta. O nisi o nei ituaiga faigafaiva e iai matatao, uua malau (toso), ma le faaogaina o upega mo le fofoga taumafa o le aiga, pe faatau foi. O le aoina ma le eliina o figota i luga o le aau o le galuega patino lava lea a tina ma le fanau mo taumafa a le aiga.

O le tele o i'a sa maua i aso ua mavae ua faigata ona maua i aso nei. O i'a o le aloalo e iai lo, tuuu, gatala,

poge/alogo, anae ma mataeleele sa tele ma faigofie ona maua i le 40 tausaga talu ai. O figota e i ai le sisi, faisua ma sea/loli/fugafuga/mamao sa tele i aso ua mavae, peitai i le taimi nei, ua pau maualalo lo latou faitau aofai, o nisi taimi ua le maua ma e tele ni itula e faaaluina i fagotaga, faatoa maua mai, faatusatusa i le 40 tausaga ua mavae.

5. TULAFONO FAALENUU : FESOOTAI MA LE SIOSIOMAGA O LE GATAIFALE O ADOLIMA UTA.

E iai tulafono a le afioaga nei sa faatulagaina mai i aso ua mavae e faasaina ai faigafaiva le talafeagai e pei o fanai'a, ava niukini, vailaau oona, ma lama moliuila, aemaise tama tane o le afioaga e maua i lo matou gataifale. O lea ua autasi ai le Komiti ma le afioaga ina ia fausia ni tulafono faa-le-nuu e fesootai ma le siosiomaga o le gataifale aua lava le puipuia o taumafaiga mo le faasaoina o le gataifale.

6. TADENAGA O LENEI TUSI TAIALA

O lenei tapenaga sa saunia lava e tagatanuu o le afioaga o Apolima Uta faatasi ai ma ni fautuaga ma le lagolagosua a le Ofisa o Faigafaiva. O se oototoga lenei i le tapenaga o lenei Fuafuaga ina ua maea ni fonotaga sa faia ua taua i lalo:

6.1 Feiloaiga Muamua ma le Afioaga

O le amataga o lenei polokalame, sa muai faatoai mai le finagalo o le Pule Mamalu a Alii ma Faipule i le Ofisa o Faigafaiva e taua mai i le Tofi Faipule o le Itumalo le tofa a Leva'a Sauaso e faailoa mai ai lo latou fia auai ma le fia lagolagoina o lenei Polokalame, mo le Puipuiga o Gataifale.

O le Aso Faraile 17 Oketopa 2003 sa faia ai le uluai feiloaiga, poo le fono muamua a le Ofisa ma le afioaga e faamalamalama ai le polokalame pe taliaina e le afioaga. O le fono foi lena sa auai ai le Faatonu Lagolago, Alii ma tamaitai Ofisa e taliaina aloaia le finagalo o le afioaga i le polokalame. O le maea o lenei feiloaiga muamua ma taliaina lelei e le afioaga le polokalame ma faia ai lava ma faatalatalanoaga ma vaega e tolu o le afioaga e aofia ai Alii ma Faipule, Komiti a Tina ma Tamaitai ma le aumaga.

6.2 Faatalatalanoaga i Vaega e Tolu

O le taua o lenei faatalatalanoaga, e vaevaeina ai le afioaga i vaega a matai, tina ma le aumaga. O nei vaega e tolu sa faatalatalanoaina e sui o le Ofisa o Faigafaiva. O le autu tonu o nei faatalatalanoaga ina ia mafai e le afioaga ona faailoa mai faafitauli o loo aliae mai i le siosiomaga o le gataifale o Apolima Uta, ma sailia ai ni aafiaga ma ni mafuaaga o nei faafitauli, aemaise o ni fofo, faatinoga ma i latou e faatinoina nei fofo. O lenei faatalatalanoaga sa faia lava i le aso 17 Oketopa 2003.

6.3 Komiti Faufautua o le Faasao

O le matafaioi a le Komiti lenei, o le tuufaatasia lea o faamaumauga ma faamatalaga mai vaega taitasi ma sa mafai ai ona latou tapenaina se ata faataitai o le Pulea o le Siosiomaga o le Gataifale ma le Vaaia lelei o i'a ma figota.

6.4 Dasiaina o le Tusi Taiala.

O le faagasologa atoa nei o fuafuaga ua tamauina i totonu o le Tusi Taiala mo le Vaaia Lelei o i'a ma figota o lo latou gataifale. O lenei fuafuaga, o se maliliega i le va o le afioaga ma le malo, ua tamauina ai fuafuaga faataatitia a le afioaga, atoa ai ma le lagolagosua mai a le Ofisa o Faigafaiva. O lenei fuafuaga sa tuuina aloaia i le Fono e sui o le Komiti Faufautua, i le latou fonotaga ma sui o le Pulega a le Ofisa o Faigafaiva. O

le pasiaina o lenei Fuafuaga, o se ki e mafai ai e le afioaga ma le Vaega o Faigafaiva ona faatinoina soo se galuega tataua ma e mae'a ona fuafua lelei. O le fono foi lea e filifilia ai se Komiti e taitaia le faagaloiga o fuafuaga ua uma ona faataatitia, ma vaaia lelei vaega uma e aiai mo lelei alualu i luma o lenei fuafuaga taua a le afioaga o Apolima Uta.

6.5 Filifilia le Komiti o le Faasao

O le Komiti o le Faasao sa filifilia mai i vaega taitasi i taimi o faatalatalanoaga, latou te mataituina fuafuaga faataatitia a le afioaga. E mae'a loa le pasiaina o le Tusi Taiala, o le a fesootai lava le Ofisa ma le Komiti i tulaga uma e manaomia ai le fesoasoani e pei ona autasi ma tamauina i le Taiala.

7. FUAFUAGA FAATAATITIA

O fuafuaga faataatitia o ni galoiga ua faamoemoe e faaono foia ai faafitauli ua fa'aalia ma faailoa mai e vaega eseese o le afioaga. E lua (2) ituaiga o fuafuaga, ma o le fuafuaga ua aupito sili ona taua o **fuafuaga faataatitia a le nuu**.

O le isi vaega o fuafuaga faataatitia a le Ofisa o Faigafaiva ma o nei fuafuaga, o le a tuuina atu ai fautuaga ma fesoasoani i nisi auala e pei o aoaoga ma le tufaina atu o pepa o faamatalaga i mataupu e fesootai i le gataifale. O galuega uma lava e faatinoina e le Ofisa o Faigafaiva, e ao ona faamaonia e le faatonu lagolago (Assistant Chief Executive Officer) a le Matagaluega o Faatoaga ma Faigafaiva.

I taimi o faatalatalanoaga i vaega taitasi, e tele ni mafuaga sa faailoa mai ae aua lava i le faafitauli ogaoga, o le faaititia lea o i'a ma figota i le aloalo ma le aau o le afioaga o Apolima Uta.

O mafuaga ma o latou aafiaga i le siosiomaga o le gataifale sa faapea ona iloiloina ma sailia. O tali o faafitauli ma fofo, poo auala e foia ai na iloiloina foi i faatalatalanoaga. E le gata i lea, sa faailoa mai ai foi ma vaega latou te faatinoina nei galuega.

O le vaega i lalo o le a auililiina atu ai atoataoa fuafuaga faataatitia sa aoina mai i vaega taitasi ma tuufaatasia e le komiti faufautua ma le lagolagosua a le Ofisa o Faigafaiva.

Tulafono Autu Tau Faigafaiva (1988) : O le tulafono a le Malo o Samoa e:

- (1) Faasaina ai Faigafaiva-le-Talafeagai.
- (2) Faamalosia ai le laiseneina o Vaa-Fagota.

Tulafono Faatonutonu Mo le Laiti Faatapulaaina o I'a ma Figota (1995) : O le tulafono lea e faatapulaaina ai le laiti o i'a ma figota, mo le fuaina o mataupegaga.

Tulafono Laiti : O tulafono a nuu ma afioaga ua amanaiaina e le faamasinoga.

TULAFONO MA FAASALAGA

7.1 Faamalosia Tulafono faaa-le-nuu: Faasaina Faigafaiva le Talafeagai

Na taua e vaega taitasi i taimi o faatalatalanoaga, o loo faaauauina pea le faaaogaina e faifaiva o fanai'a, ava niu kini ma vailaau oona i fagotaga. O nei faigafaiva le talafeagai ua mautinoa lo latou tulaga ogaoga i le faatamaiaina o le siosiomaga o le gataifale. Ua aafia ai i'a laiti aemaise o nofoaga taua mo meaola o le sami mo lo latou malu puipua, e pei o amu. O le faaleagaina o le gataifale mai nei ituaiga auala faaigafaiva e umi ma tele se taimi e toe faafoi ai i le lelei sa iai.

Fuafuaga Faataatitia a le Afioga

Talu ai ona o le tulaga pagatia ua iai le gataifale o lenei nuu o Apolima Uta, o lea ua ae ai se finagalo autasi i le Komiti ua filifilia ina ia matua faamalosia loa tulafono a le afioga e faasaina ai faigafaiva le talafeagai e pei o fanai'a, ava niu kini ma vaila'au oona. O le puipuiga ma le faamamaluina o nei tulafono, o le a i aao lava o le pule mamalu a Alii ma Faipule faatasi ai ma le lagolagosua a tagata nuu o le afioga.

Fautuaga

Ia toe faamalosia ma faamamaluina tulafono a le afioga ua taua i lalo mo le faasaina o faigafaiva le talafeagai.

Tulafono

Mo le mamalu o le atunuu atoa ai ma tagatanuu o Apolima Uta:

Ua matua faasaina lava faigafaiva le talafeagai e pei o fanai'a, ava niukini ma vailaau oona oona toe faatinoina i gataifale o Apolima Uta e amata mai i le tuaoi i sasae se ia oo atu i le tuaoi i sisifo o le afioga.

Faasalaga

Mo tagata o le afioga e solia lenei tulafono, o le a faasalaina i le \$500.00.

O tagata mai isi afioga e solia lenei tulafono o le a molia sao i le Tulafono Autu a le Malo o Samoa ma Tulafono Laiti a le Afioga.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva i le faatinoina o fuafuaga faataatitia a le afioga e ala atu i lana polokalame fesoasoani mo aoaga tau faigafaiva, ma saunia pepa o faamatalaga mo le faamalamalama atiliina o nei fuafuaga.

7.2 Ia Faasaina le toe Lafoai o Lاپisi i le Sami ma le Matafaga

O le faasaina o le lafoai o lapisi ma otaota i le sami, ua avea ma mafuaaga o le faateleina ai o namu, ma manunua ai nisi o faifaiva i atigiapa, atigifagu ma uamea. Ua faapena ona avea ma punaaga o faamai ma tulai mai foi o se nofoaga le talafeagai mo le ola lelei o ia ma figota i le gataifale.

Fuafuaga Faataatitia a le Afioga

O le a faamalosia e le afioga fuafuaga a le Malo e faasaina ai ona toe lafoai lapisi i le matafaga ma le sami

ae saunia ni galuega mo le afioaga atoa e faamama ai lapisi, e pei o le fausiaina o fata lapisi po o le eliina o se lua e lafoai iai.

Tulafono

Ua matua faasaina ona toe lafoai lapisi ma otaota e pei o atigi apa, atigifagu, uamea, ma pepa iila, i le sami ma le matafaga, e ono aafia ai le gataifale o lenei afioaga.

Faasalaga

Mo tagata o le afioaga e solia lenei tulafono, o le a faasalaina i le \$200.

O tagata mai isi afioaga e solia lenei tulafono o le a molia sao i Tulafono Laiti a le Afioaga.

Fuafuaga Faataatitia a le Ofisa o Faigafaiva

O faamatalaga eseese e faatatau i aafiaga o le siosiomaga o le gataifale ma ona tamaoaiga o le a fesoasoani atu ai le Ofisa o Faigafaiva e aotauina ai le afioaga i le taua o le teu maluina o lapisi ma otaota i nofoaga talafeagai. O le a faia foi se polokalame i le Televisi e faalauiloa atili ai le taua o le siosiomaga mama.

7.3 Ia Faasaina Faigafiva mai isi Afioaga

Na taua e le mamalu o le afioaga, ua maitauina le toatele o tagata mai isi afioaga o loo latou fagotaina gataifale o le afioaga o Apolima Uta. Ua le gata i lea, latou te faatamaia foi le gataifale i ni auala le talafeagai ma ua utiuti ai le tamaoaiga e maua mai i aloalo o loo faalagolago iai le afioaga.

Fuafuaga Faataatitia a le Afioaga

Ua iai le fuafuaga a le afioaga o le a faia se Tulafono e faasaina ai tagata mai isi afioaga ona fagotaina lo latou gataifale.

Tulafono

Ua matua faasaina lava tagata mai isi afioaga ona toe fagotaina gataifale o Apolima Uta.

Faasalaga

Soo se tasi na te solia lenei tulafono, o le a molia sao ma faasalaina i le Tulafono Faatonutonu o Faigafaiva a le Malo o Samoa.

Fuafuaga Faataatitia a le Ofisa o Faigafaiva

O le a lagolago malosi le Ofisa o Faigafaiva i so o se fuafuaga a le afioaga ua talafeagai lelei ma tulafono faa-le-malo e pui-puia ai le siosiomaga o le gataifale. Ua maea saunia foi pepa o faamatalaga mo le faamalamalama atiliina o nei fuafuaga ma lo latou taua.

7.4 Ia Faasaina ona toe Fagotaina mai i'a ma Figota Laiti

O le tele o afioaga ua latou faaalua mai le toatele o faifaiva latou te fagotaina mai i'a ma figota laiti. O le mafuaaga lea ua vave faaititia ai i'a ma figota, ona ua le maua se avanoa e tautuufua ma fanafanau ai.

Fuafuaga Faataatitia a le afioaga

Ua iai le fuafuaga a le Afioaga, o le a lagolagoina le Tulafono o Faigafaiva mo le lapopoa faatapulaa e fagotaina ai i'a ma figota.

Tulafono

Ua matua faasaina ona toe fagotaina i'a ma figota laiti, mai le gataifale o Apolima Uta, e pei ona faaalua i le Tulafono Faatonutonu o Faigafaiva a le Malo o Samoa.

Faasalaga

Soo se tagata-nuu o lenei nuu na te le usitaia lenei tulafono o le a faasalaina i le salatupe e \$500.00. O tagata mai isi afioaga o le a molia sao i le Tulafono Faatonutonu o Faigafaiva a le Malo o Samoa mo le fua faatapulaa o i'a ma figota.

Fuafuaga Faataatitia a le Ofisa o Faigafaiva

O le a fesoasoani le Ofisa mo le faamalosia o Tulafono Faigafaiva mo le fua faatapulaa o i'a ma figota aemaise le saunia o pepa o faamatalaga e faamalamalama ai le puipuiga o le fagotaina o i'a ma figota laiti.

7.5 IA AOINA MAI UTA ALAMEA MA FAATAMA'IA AI

O le alamea o se meaola o le ituaiga o le aveau ma e nofo i luga o le aau. O lenei meaola e na te aina meaola ninii ua taua o POLIPE o loo tutupu mai ai amu. A oo ina faateleina le alamea o le a faapena ona latou faatamaiaina se vaega tele o le aau ma aveai ai o se tulaga pagatia. O le a aafia ai le tele o meaola o loo faalagolago i le aau mo nofoaga ma meaai. E le mafai ona faaumatia le alamea i le vaevaeina o lona tino i le sami, aua e mafai ai e itu tino ona faatupuina ma ai nisi alamea fou.

E pau le auala e mafai ona tapeina ai lenei meaola o le aoina mai lea i uta i le pau mautu e faamagoina ai pe tanuina foi, pe susunuina. E mafai ona faaogaina lona tino pe a mago, ma o se faalelei eleele mo faatoaga ma mea toto.

FUAFUAGA FAATAATITIA A LE AFIOAGA

Ua faailoa mai e le afioaga o Apolima Uta, o le alamea o se tasi lea o mafuaaga o le pe o le amu o le gataifale. E aafia ai foi le soifua o tagata faifaiva ma ua fautuaina ai e le komiti ina ia faatinoina le aoina i uta mo le faatamaiaina.

FAUTUAGA

Ua fautuaina e le komiti faufautua o le aoina mai i uta o alamea, o le galuega e patino lava i tagatanuu o le afioaga. O le faatinoina o lenei fuafuaga, o le a aoina alamea tai ono masina ma aumai i le pa'u matu e faatamaia ai ma faaogaina mo faalelei eleele.

FUAFUAGA FAATAATITIA A LE OFISA O FAIGAFIIVA

E leai se polokalame a le malo ua fuafuaina e totogi ai le faatamaiaina o alamea, vagana ai ni fautuaga e fesoasoani atu ai le Ofisa i auala e talafeagai e tineia ai lenei meaola faalafua, e ala lea i pepa o faamatalaga ua maea ona saunia.

7.6 Ia Faasaina Upega ma Tili mata-ninii.

O le faaogaina o upega ma tili mata-ninii ua maitauina le tele o i'a laiti ua faatamaia ai. Ua iai le talitonuga o le a oo atu i se tulaga faaletonu i'a maua, pe a faaauuina pea le faaogaina o nei ituaiga faigafaiva. O le a oo ina faaititia i'a e mafai ona oo atu lo latou lapopoa e maua ai le avanoa e fanafanau ma tautuufua ai.

Fuafuaga Faataatitia a le Afioga

Ua faailoa mai e le Komiti o le faaogaina o upega ma tili mata-ninii. O se tasi lea o mafuaaga ua faaititia ai i'a maua i le gataifale. O lea ua aiaia ai loa se tulafono ina ia faasaina ai upega ma tili mataninii ona toe faaogaina i fagotaga i le gataifale o le afioga. Ua faapea foi ona faaalua mai e le afioga lo latou matua lagolagoina o le tulafono o Faigafaiva a le Malo ua iai nei mo le faatapulaaina o mataupega ma tili.

Tulafono

Ua matua faasaina lava ona toe fagotaina upega tatao e i lalo ifo o le 2inisi (50mm) ona mataupega faapea foi ma tili, ia le i lalo ifo o le 1.2inisi (30mm), i le gataifale a Apolima Uta.

Faasalaga

O soo se tagata o le afioga e solia lenei tulafono o le a faasalaina i le \$500.

O tagata mai isi afioga o le a molia sao i le Tulafono Faatonutonu o Faigafaiva a le Malo o Samoa.

Fuafuaga Faataatitia a le Ofisa o Faigafaiva

O se lagolagosua mai le Ofisa o Faigafaiva e ala i lana Polokalame Fesoasoani o le tuuina atu o faamatalaga e saga faamautuina ma faamaopoopoina ai lenei tulafono.

7.7 Ogasami Faasaina

O se vaega o le gataifale ua faasaina, e le tatau ona toe aafia i ni faigafaiva. O le avea o se nofoaga o le gataifale ma nofoaga faasao, e ao ona aafia ai le malupuipua o le siosiomaga ma ona tamaoaiga i figota ma i'a.

O lenei nofoaga faasao, o le a faasaina ai amu, aau, faapea ma i'a ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma punaaga o i'a ma figota o loo aumau i vaega faasaina, ma o le a tafefea atu o latou fua fanau ma faatupuina ai nisi meaola i nofoaga ua le maua ai nisi i'a ma figota. O le a le pine ae manuia ai si o tatou atunuu, aemaise o tupulaga o le lumanai.

Fuafuaga Faataatitia a le Afioga

* Galulue faatasi ma le lagolagosua a le Ofisa o Faigafaiva i le iloiloaina o se vaega talafeagai o le gataifale e avea ma vaega faasaina.

* Talanoaina ma auiliiliina le lipoti ma ia faia se faaiuga i le faavaeina o le ogasami faasaina.

* Faatinoina le mataituina, tausiga ma le vaaia lelei o le ogasami faasao.

Tulafono:

Ua matua faasaina lava ona toe faatinoina soo se ituiga faigafaiva, taelega, solia, pasia pe uia e vaa fagota ma soo se tasi totonu o lenei ogasami faasaina.

Faasalaga:

Soo se tasi o le afioga na te solia lenei tulafono o le a faasalaina i le \$500.

O tagata mai isi afioga o le a molia sao i le Tulafono Faatonutonu o Faigafaiva a le Malo o Samoa.

Fuafuaga Faataatitia a le Ofisa o Faigafaiva

* Faatinoina le iloiloaga o le tulaga talafeagai o se vaega o le gataifale e avea ma nofoaga faasaina.

* Saunia le lipoti mo le tuuina aloaia atu i le Komiti o le Ofisa ma le Fono.

TULAFONO

Ua matua faasaina soo se tagata ona uia, taele, solia, po o le faatinoina ai foi o soo se ituaiga o faigafaiva poo se isi lava mea i totonu o lenei ogasami faasao i Apolima Uta.

FAASALAGA

Soo se tagata e solia lenei tulafono o le a faasalaina i le \$500.00.

O tagata mai isi afioaga o le a molia sao i le Tulafono Faatonutonu o Faigafaiva a le Malo.

7.8 Tufaina atu ma le Faa-faatoagaina o l'a ma Figota

O i'a ma figota o loo aumaia i isi atunuu i fafo atu o Samoa, e faa-faatoagaina ma tausia lelei i se nofoaga ua maea saunia e le Ofisa o Faigafaiva mo le faafaatoagaina o i'a ma figota e pei ona iai i Toloa. O le tufaina atu o i'a ma figota, e faamautu ma tufatufaina i nuu ma afioaga, i se ogasami ua talafeagai ma mautinoa lelei lo latou talafeagai mo le ola saogalemu o i'a ma figota. O le tufaina atu ma faa-faatoagaina, o nisi o atinae mo le faatupuina o figota aua le fofoga taumafa o afioaga. O nei auala faa-atinae e moomia ai tele le galulue filiga, felagolagomai ma le faamaoni o tagatanuu o afioaga taitasi ina ia ausia se taunuuga lelei.

Na faaalua mai e vaega taitasi, o nisi o figota sa masani ona maua i lo latou gataifale ua tauau ina mou atu. Ua masalomia lo latou le toe maua i le taimi nei, ma ua latou faatalosagaina ai ni figota e faa-faatoagaina i lo latou gataifale.

Fuafuaga Faataatitia a le Afioaga

Ua iai le fuafuaga a le afioaga o le a latou mataituina ma vaaia lelei figota o le a faaooina atu e faa-faatoagaina i aloalo aemaise o le mautinoa lelei o lo latou saogalemu mai le faaleagaina.

Fuafuaga Faataatitia a le Ofisa o Faigafaiva

O le galuega fesoasoani a le Ofisa e tufaina atu figota e faa-faatoagaina i aloalo ma iloiloina le tulaga talafeagai o le gataifale mo nei figota. Ua maea saunia lelei foi ni pepa o faamatalaga e faamalamalamaina ai le olaga faa-natura o nei figota aemaise o le mataituina ma le tausia lelei e puipuia ai mai le faatamaiaina.

7.9 Taofia le Taina i lalo o Laau i autafa o nofoaga faa-taufusi

O le taina i lalo o laau i autafa o nofoaga faa-taufusi, ua avea lea ma faapogai o le palapala tafia ma agai atu le sami. O ia palapala o loo filogia faatasi mai ai ma nisi o fetilaisa poo faalelei eleele o loo faaaogaina e le au-faifaatoaga mo a latou faatoaga. E mafai e palapala nei ona faatupuina mai le limu ua tele ina faaleagaina ai e anoano o meaola o loo ola i le sami. Ua le gata i i'a ma figota ae ua faapena foi ona faaititia ai amu i le gataifale.

Fuafuaga Faataatitia a le Afioaga

Na faaalua mai e le Komiti o le Faasao, o se tasi lea o mafuaaga ua ala ai ona faaititia i'a ma figota. O lo manatu ua tataua ona faia se fuafuaga a le afioaga e vave foia ai lenei faafitauli ua aliae mai. O lea ua matua fautuaina ai e le Komiti tagata uma o le afioaga ina ia taofia loa ma faasaina lenei fuafuaga, o le taina i lalo o laau o loo ola i autafa o taufusi.

Fautuaga mai le Komiti

Ua fautuaina a le Komiti mo le mamalu o le afoaga, ina ia taofia le toe taina i lalo o laau i autafa o nofoaga faa-taufusi. E le gata i lea, ae ia toe totoina nisi laau mo le taofia o le palapala tafia.

Fuafuaga Faataatitia a le Ofisa o Faigafaiva.

O le a mafai ona faia pea ni tautalaga ma ni polokalame faa-le-aoaga ina ia faamalamalama atiliina ai tulaga uma e foia ai faafitauli o loo aliae mai, ma ua taua i luga.

7.10 Mana o Talosaga

O talosaga ma talitonuga faa-le-lotu e tuufaatasia, o se tasi lea o faamoemoega ua talitonuina lona taua aua le puipuia ma le faasaoina o le siosiomaga o le gataifale ma ona tamaoaiga.

Fuafuaga Faataatitia a le Afoaga

O le sao taua o le aufailotu, o le unaia lea ma faamalosiau i tagatanuu ina ia latou faatauina le puipuia ma le faasaoina o le siosiomaga o le gataifale ma ona tamaoaiga. O se sao taua tele le tuufaatasia o finagalo o tagata ina ia galulue faatasi ina ia foia faafitauli o loo aliae mai i le siosiomaga o le gataifale ma ona tamaoaiga. Na lagolagoina foi e le Komiti lenei fautuaga ua fautuaina ai le mamalu o le afoaga. O lea ua ae ai se tofa i le Komiti ma le afoaga o le a latou faamamaluina faatasi ma le Malo o Samoa le aso faailogaina mo tatalo ma anapogi i tausaga taitasi. O ia tatalo ma anapogi o le a talosia ai laufanua, gataifale aemaise tagatanuu o le afoaga.

Fuafuaga Faataatitia a le Ofisa o Faigafaiva

O le a mafai ona tuuina atu ni fesoasoani mai le Ofisa mo le mamalu o le aufailotu e ala i pepa o faamatalaga ma tautalaga faale-aoaga e fesoasoani i le tapenaina o a latou lauga ma aoaga mo le puipuia ma le faasaoina o le siosiomaga o le gataifale ma ona tamaoaiga.

8 TALOSAGA A LE AFOAGA

O talosaga uma sa mafai ona tuuina mai e sui o le afoaga sa auai i fonotaga ma le Ofisa o Faigafaiva i taimi o faatalatalanoaga ma Vaega e Tolu. O talosaga uma foi la ua tuuina mai sa faamautuina e le Komiti o le Faasao i la latou fonotaga ma le Ofisa.

O talosaga uma sa tuuina mai o loo faailoa atu i lalo.

- Ogasami Faasaoina
- Vaa Fagota
- Tilapia
- Faisua, Aliao, Alili ma isi Figota
- Aoaga i mea tau faigafaiva (fausiaina o mea fagota, tausaiaina o afi o vaa, tausua ma le vaaia lelei o faisua, ma isi aoaga)

9. TOE ILOILOINA O LENEI FUAFUAGA TATAU

9.1 OTOOTOGA

O le toe iloiloina o lenei fuafuaga tatau, e sailia ai le agai i luma ma lona toe suesueina ina ia faailoa le taua

ma le aoga o lenei polokalame i totonu o nuu ma afoaga, aemaise o ni auiliiliga maumaututu, i le tulai mai o galuega fai a le afoaga ma le ofisa i le faataunuuna o fuafuaga faataatitia e pei ona taua i luga. O lenei foi iloiloga e lipotia ai le manuia ma ni faaletonu o le polokalame talu ona faavaeina i le afoaga.

9.2 FUAFUAGA FAATAATITIA A LE AFOAGA MA LE OFISA O FAIGAFIIVA

Ua iai le maliliega a le Komiti faufautua a le afoaga ma le Ofisa o Faigafaiva o le a toe auiliiliina lenei Fuafuaga Tatau pe a maea le ono(6) masina talu ona pasia lenei tusi i le Fono Tele. O le a toe feutagai le Komiti ma le Ofisa i se aso o le a atofaina pe a atoa le 6 masina.



10. KOMITI O LE FAASAO O LE GATAIFALE

Komiti a Matai		Komiti Taulele'a	
1	Sa'u Lafoga	9	Aea Aita
2	Sa'u Lapi	10	Manu Toao
3	Sa'u Siaosi	11	Tausagi Aea
4	Latu Lamese	12	Faamanu Toao
5	Leala Palota	13	Pua'a Vase
6	Mapu Fetu		
	Pulenuu		Sui Komiti
	Peresitene		Sui Komiti
	Failautusi		Sui Komiti
	Sui Komiti		Sui Komiti
	Sui Komiti		Sui Komiti
	Sui Komiti		Sui Komiti

7 Sa'u Iosefo
8 Sa'u Ono

Sui Komiti
Sui Komiti

KOMITI O LE FAASAO



Nisi o sui ole komiti o Apolima-uta. Le susuga ia Sa'u Lapi ma Aea Aita na auai i le toe iloiloina o le Tusi Ta'iala mo le Pulea Tatau ma le Vaaia Lelei o I'a ma Figota.

11. VAAIGA MATAGOFIE I LE O APOLIMA-UTA



EFKS APOLIMA-UTA



AOGA FA'AITUMALO A'ANA